

Jo-Efeso

JANDIKO: Jaote Paulo

KAR NDIKO: Rumi

KINDE NDIKO: 60 kata 61 E YIK RUOTH (AD)

Gik Manie Iye

Baruwani Paulo nondike kaen e twech e dala mar Rumi, nondike mondo ohogo kendo ojiwgo jo-Kristo mane odak e piny Asia Matin. Otemo nyisogi weche mamoko mane osetimore chon, aa chakruok kama Nyasaye noselosoe chenro mar piny, nyaka kawuono makoro Nyasaye chiwo warruok ne joma oyie kuom Kristo, kendo nyaka giko kama richo duto ibiro tieko chuth. Onyisogi ni ngima mwadakieni nitie chandruok mang'eny nikech wan kod lweny gi teko maricho 6:12, to kaka wanto wan kaachiel e ringre Kristo, wan gi teko mar chungo motegno. Bang' mae to koro Paulo nyiso kaka wanyalo dak adimba kaka jo-Kristo e yore mag kend, timbewa jonyuol, nyithindo kod jotich .

THORRO

Puonj maduong' ne jo-Efeso nyisowa ni chenro mar Nyasaye mosiko iyudo kuom Kristo, kod kuom ringre ma en kanisa. Ka ng'ato oyie, to en kuom Kristo kendo onwang'o warruok kod kar pondo. Magi duto Nyasaye nochano aa chakruok, kendo joma oyie Nyasaye osemiyo gik ma giremo duto. Paulo tieko kitabuni kopuonjo jakristo mwandu ma Nyasaye osechiwo ni joge, kuom mano Satan onge teko nikech giko lweny to ja-Kristo ema nigi loch.

WECHE MOCHAN KAE GIN:

1. Chenro mar Nyasaye gi warruok mar ng'at moyie 1:1-2:22
2. Midhiero mar Injili 3:1-21.
3. Ngima mar ja-Kristo e piny 4:1-5:21
4. Dak mar ja-Kristo gijowadgi 5:22-6:9
5. Lwenj ja-Kristo kod richo 6:10-24

1 An Paulo jaote mar Kristo Yesu kuom dwaro mar Nyasaye, andikonu un joma ler man Efeso jogo ma luwo Yesu gi chuny achiel:

²Ng'wono gi kuwe moa kuom Nyasaye Wuonwa kod Ruodhwa Yesu Kristo obed kodu.

Gweth Mag Chuny Man Kuom Kristo

³Pak obed ni Nyasaye ma wuon Ruodhwa Yesu Kristo, moseguedhwa kod gueth duto mag chuny koa e polo kuom Kristo ⁴Kane pok ochue piny,

noyierowa kuom Kristo mondo wabed maler maonge mbala e nyime. ⁵Nikech herane nowalowa chon mondo wabed yawuote kuom Yesu Kristo kaluwore gi chenrone kod dwarone ⁶notimo kamano mondo ng'wonone man gi duong' mane ochiwo nono oyud pak, ma osemiyo nono kuom Jalno mohero. ⁷Kuome nikech rembe ema waseyudoe warruok kod weruok mar richo, kaluwore gi ng'wono mar Nyasaye mogundho, ⁸mane oolonwa mogundho kaluwore gi riekone kod ng'eyone. ⁹Ose elonwa maling'ling' mar dwarone, mana kaka nochano chon ni

notimrenwa kuom Kristo, ¹⁰ka kindeno nochopi nochano mondo oket gik moko duto manie polo gi piny e bwo loch achiel, maen Kristo.

¹¹Kuome bende ema noyierowae mondo wabed jocham girkeni; kaluwore gi chenrone motimogo gik moko duto moluwore gi dwarone, ¹²mondo mi wan mane wakuongo geno kuom Kristo, wadag ngima mamiyo ipako duong'ne maler. ¹³To un bende nokwanu kaka Jo-Kristo kane uwinjo wach mar adier ma en Injili mar warruok. Kane useyie kuome noketonu kido mar Roho Maler mane osingi, ¹⁴ma en singo manyiso ni wanayud girkeni nyaka chopi kinde mar warruok mar .b-Nyasaye, kuom pak mar duong'ne.

Duoko Erokamano Kod Lamo

¹⁵Mano emomiyo, nyaka ne awinj wach yie ma un-go kuom Ruoth Yesu kendo kuom hera ma uherogo jomaler duto, ¹⁶pok aweyo duoko erokamano nikech un, ka aparou e lemona. ¹⁷Asiko kakwayo mondo Nyasach Ruodhwa Yesu Kristo, Wuon duong' duto omiu Roho mamiyou riekto kendo mafweny-onu tiend gik mopondo mondo ung'eye maber. ¹⁸Bende alamonu mondo chunyu maiye oyawre mondo ung'e tiend geno ma oseluongoue, ma gin girkeni mogundho mokano ni jomaler, ¹⁹kod tekone maduong' mokalo apima mosemiyowa wan joma oyie. Tekoneno nyiso tich mar tekre maduong', ²⁰ma nonyiso kuom Kristo kane ochiere oa kuom joma otho, mi omiyo obedo e bade korachwich e polo, ²¹kuma oyombo loch duto, gi teko gi telo gi nyalo kod duong' kod nyinge duto minyalo chiw, ok e ndaloni kende to kata e ndalo mabiro. ²²To Nyasaye noketo gik moko duto e bwo tiende, kendo nowale odok Wich moriwo gik moko duto ne kanisa, ²³ma en ringre , Jal ma opong'o kendo romo gik moko duto.

Bedo Mangima Ei Kristo

2 To un ne utho e timbeu maok kare kod richo, ²mane udakie ka uluwo timbe piny, kendo ruodh pinyini man-gi loch e kor polo, ma bende tekone tiyo e chuny joma ok winj wach. ³Chutho chon waduto ne wachal kodgi, ka e ngimawa ne watimo gik ma ngima mar dhano dwaro, kendo waluwo gombo kod paro mag ringruok. Wan bende, e kitwa, mana kaka ji mamoko , ne wan e bwo mirima.

⁴To kuom hera maduong' mane Nyasaye oherowago kod kechne mogundho, ⁵nomiyo wabedo mangima kuom Kristo, kata obedo ni ne watho nikech kethowa, osewaru kuom ng'wono. ⁶Kendo Nyasaye nochierowa gi Kristo, momiyo wabet kode e duong' mar polo ei Kristo Yesu, ⁷mondo eka onyisgo tienge duto mabiro mwandu mar ng'wonone mokalo apima, ma wabiro yudo kuom kech mosekechowago kuom Kristo Yesu. ⁸Nikech kuom ng'wono useyudo warruok kuom yie, to ok nikech tim maber moro amora musetimo. En mich ma Nyasaye chiwo nono, ⁹ok kuom tich ng'ato maber; mondo mi ng'ato kik sungre. ¹⁰Mano timore nikech wan chuech Nyasaye, ma nochueyo kuom Kristo Yesu mondo otim timbe mabeyo, ma Nyasaye owuon ema nosechano chon mondo watim.

Achiel E Kristo

¹¹Kuom mano paruru ni chon ne un Ogendini kuom nyuol kendo ne iluongou ni "joma ok oter nyangu" gi jogo maluongore ni "oter nyangu" (mano motim e ringruok gi lwet ji) ¹²paruru bende ni kindeno ne upogoru gi Kristo, kendo ne uonge e kanyakla mar jo-Israel, bende ne un welo kuom singruok mar winjruok, ne uonge geno kata Nyasaye e pinyini. ¹³To koro kuom Kristo Yesu, un ma chon ne un mabor, koro osekelu machiegni kuom remb Kristo.

¹⁴Nikech owuon e kuwe marwa, moseriwowa mwabedo gimoro achiel, komuko oinga mar sigu mane opogowa,

kendo ¹⁵kochiwo ringre owuon, osetieko chike duto, gi wechege duto. Notimo kamano mondo ochwe dhano achiel manyien, kar ariyogo, eka okel kuwe, ¹⁶kendo kuom ringruok achielni ema oseriwe ogendini ariyogi gi Nyasaye kuom msalaba, mi oketho sigu mane nie kind ogendinigi. ¹⁷Nobiro moyalo kuwe ne un mane un mabor, kendo oyalo kuwe ni jogo mane ni machiegini. ¹⁸Nikech kuome waduto koro wan-gi yo mwachopogo ir Wuoro, kuom Roho achiel.

¹⁹Emomiyo koro ok un welo kata jodak, to un oganda achiel gi joma ler duto, kendo jood Nyasaye, ²⁰moger e mise achiel mar joote gi jonabi; ka Kristo Yesu owuon e rariw. ²¹Kuome ema gedo duto oriwore kaachiel kendo dongo mibed hekalu maler man kuom Ruoth. ²²Kendo kuome ema un bende igeroue kaachiel mondo udok kar dak mar Nyasaye kuom Rohone.

Paulo Jayalo Mar Ogendini

3 Mano emomiyo an Paulo asedoko misumba Kristo Yesu nikech un Ogendini.

²Adier chutho usewinjo kaka Nyasaye nomiya tijni mar ng'owono nikech un, ³tiende ni, chenro mopondono nolerna tiende kaka obet, mana kaka asendikonu gi weche manok. ⁴Kusomo barupano to ubiro medo ng'eyo kaka winjona chal korka weche mopondo mag Kristo, ⁵e kinde machon Nyasaye ne ok oelo tiend wachni ne ji, to koro oseeele kuom Roho, kokonyore gi jootene maler kod jonabi. ⁶Wach mopondoni en ni kaluwore gi wach maber, Ogendini bende koro osebedo jocham girkeni kaachiel gi Israel, kagin kaachiel kaka ringruok achiel, kendo giriwore kodwa e singruokni kuom Kristo Yesu.

⁷Ne abedo misumba mar wach maber ni kuom mich mar ng'wono mane Nyasaye omiya kaluwore gi tekone matiyo kuoma. ⁸Kata obedo ni an e ng'a-ma tinie moloyo jo- Nyasaye duto to ng'-

wononi nomiya mondo ayal ne Ogendini mwandu maok rum mar Kristo; ⁹kendo mondo anyis ji duto ong'e maler tichna kuom wach mopondoni, mosebedo kopandi kuom Nyasaye mane ochueyo gik moko duto e higini mokalo. ¹⁰Dwaro mare ne en ni koro onyis kit riekto mar Nyasaye ni joloch gi weg teko manie polo, kokonyore gi Kanisa, ¹¹notimo ma kuom Kristo Yesu Ruodhwa, kaluwore gi dwarone mane osechano chakre chon ni notim. ¹²En ema ka wanie iye kendo ka wayie kuome to wanyalo dhiyo e nyim Nyasaye ka wan thuolo chutho kendo ka wan gi chir. ¹³Emomiyo akwayou ni kik chunyu nyosre nikech sand ma ayudo nikech un, ng'euru ni sandruokga, e duong' maru.

Lamo Ni Jo-Efeso

¹⁴Nikech ma, ago chonga piny e nyim Wuoro, ¹⁵nikech kuome ema dhoudi mag joma oyie duto manie polo gi piny judoe nyingegi madier. ¹⁶Alamo Nyasaye mondo kuom duong'ne mosiko omiu teko e ngimau maiye kuom teko mar Roho mare, ¹⁷mondo eka Kristo osiki e chunyu kuom yie. Alamo bende ni ka usiko kuome kendo udongo e herane, ¹⁸mondo eka ubed gi teko un kaachiel gi joma ler duto kuyango malong'o hera mar Kristo, ma lachne, gi borne, aa piny nyaka malo kod tutne okalo apima, ¹⁹chutho mondo ung'e hera modhiero ng'eyo gi riekto duto, eka upong' gi kit Nyasaye duto.

²⁰Mad Jal maka wakwayo gimoro amora to chiwo mathoth moloyo kaka wakwaye kata kaka waparo, kuom tekone matiyo kuomwa, ²¹oyud duong' e kanisa kendo kuom Kristo Yesu e tienge duto manyaka chieng'. Amin.

Bedo E Achiel Kuom Kristo

4 Emomiyo akwayou, an ng'at motue nikech tich Ruoth, mondo udag dak mowinjore gi luong ma Nyasaye noluongoue. ²Kinde duto beduru joma muol chutho, modimbore, kendo ma hore mos

ka ukawo ting' joweteu kuom hera. ³Temuru duto munyalo mondo urit achiel mar Roho kusiko e kuwe moriwowa kaachiel. ⁴Nitie ringruok achiel kod Roho achiel, mana kaka ne oluongu e geno achiel kane oluongu ⁵bende wan-gi Ruoth achiel, yie achiel, gi batiso achiel; ⁶Nyasaye achiel kendo Wuon ji duto, En moloyo duto kendo en ema otiyu kuom duto.

⁷Ng'ato ka ng'ato kuomwa Kristo osemiyo ng'wono kaluwore gi dwarone.

⁸Mano emomiyo owacho ni,

"Kane oidho malo to ne omako jotwech motweyo mi nomiyo ji mich."

⁹To ere tiend wachni, "Nine oidho?"

Donge onyiso ni nolor bende mwalo e bwo piny?

¹⁰Omiyo Jalno mane olor bende ema noidho malo kuma bor moyombo polo duto, mondo eka opong' piny duto gi duong'ne.)

¹¹En bende ema nochiwo mich ni ji koyiero jomoko mondo obedi joote, to jomoko jonabi, to moko joland Injili, to jomoko jokwath gi jopuonj.

¹²mondo gitieg jo-Nyasaye duto mondo obed molony kuom tiyo tich Kristo, eka ringre Kristo ogerre, ¹³nyaka chop wan duto wabed achiel e yie mawan-go kuom Wuod Nyasaye kendo wamed ng'eye chuth. Kamano otimore eka wanabed joma otegnio chutho, kendo wana chop e rang'iny mogik kuom Kristo.

¹⁴Koro ok wanachak wabed kaka nyithindo mayomyom, ma bagni koni gi koni nikech yamb puonj mayoreyore, ma dhano molal siekogo mondo giwuondwago kendo gipudhwago oko wawe yie madiera ¹⁵To wana siki ka wawacho adiera e hera kendo kawa dongo e yore duto kuom en ma en Jatelo, tiende ni Kristo. ¹⁶Kuome ema ringruok duto ochomore, leche omakore gi fuon ka fuon, kendo ka fuon moro ka moro tiyo tichne kaka dwarore. Kuom mano ringruok dongo kendo gerore kuom hera.

Dak Kaka Nyithind Ler

¹⁷Kuom mano awachonu kendo ka aramo kuom Ruoth, neuuru ni ok uwuotho kaka jopiny mokiya Nyasaye wuotho ka pachgi modinore wuondogi. ¹⁸Gin mudho odino pachgi, momiyo gipogore gi ngima mar Nyasaye nikech kia margi mawuok e chunyi matek. ¹⁹Kaka pachgi mar pogo ber gi rach oselal, koro gichiwore ni anjawo kod timo gik moko duto mochido magisiko gi-gombo timo mang'eny.

²⁰Un to, ne ok ung'eyo Kristo e yo machal kamano. ²¹Adier, nuwinjo kuome, kendo nopuonju wachne, kaluwore gadiera man kuom Yesu. ²²Nopuonju mondo uwe kit ngimau machon kendo ulony dhano machon maketo kethruok nikech gombone maricho mag wuond ²³eka mondo chunyu maiye mar parou oloki obed manyien ²⁴kendo mondo uruakru gi dhano manyien, mochue mondo ochal gi Nyasaye kuom ngima makare mar adier kendo maler.

²⁵Emomiyo ng'ato ka ng'ato kuomu nyaka we miriambo duto kendo wach adiera ni nyawadgi, nikech wan duto wan fuond ringruok achiel. ²⁶"Kaponi mirima oloyi to kik itim richo." Kik iwe chieng' podhi ka pod in-gi mirima ²⁷kendo kik imi jachien thuolo mar loyi. ²⁸Ng'ato ma yandi kwelo nyaka koro we kuo chuth to nyaka oti tich gi lwetene owuon mondo okonyreggo kendo okony bende joma moko mochando.

²⁹Kik uyie weche maricho wuogi e dhau, to mana weche manyalo, konyo kuom gero ji kaluwore gi dwarogi mondo wecheu okony joma winjo. ³⁰Bende kik umi Roho Maler mar Nyasaye chunyi lit nikech en ema Nyasaye osemiyougo kaka kido ni noresu chieng' resruok. ³¹Weuru chuth kecho, gi mirima, gi ich wang', gi gwandruok, gi ayany, kod himruok duto. ³²Beduru mang'won kendo gi kech ni joweteu, ka ng'ato ka ng'ato weyo ni nyawadgi kethone, mana kaka un bende

Nyasaye noweyonu kuom Kristo.

5 Kaka un nyithind Nyasaye mohero kata kit dwanyruok ubed machal kode, ²kendo udag e ngima mar hera kaka Kristo ne oherowa mi ochiworenwa kaka chiwo kendo misango madung' tik mamit ni Nyasaye.

³To e dieru kik winjre ni nitie terruok kata kit dwanyruok moro amora, kata wuoro, nikech gik ma kamago ok owinjore jomaler maluwo Nyasaye otim. ⁴Bende, tim moro amora makuodo wich, kata wach mochido, kata angera mag oyuma ok owinjore kodu, makmana duoko ni Nyasaye erokamano. ⁵Ng'euru malong'o ni onge ng'at maja chode, kata ma ngimane odwanyore, kata maja wuoro (Ng'at ma kamano lamo nyiseche manono) manoyud gueth mar loch Kristo gi Nyasaye. ⁶Kik uyie ng'ato wuondu gi weche manono, nikech gik ma kamago ema miyo Nyasaye olo mirimbe kuom joma ok winj wachne. ⁷Omiyo kik ubed e achiel gi joma kamago.

⁸Nikech chon ne un jomudho to sani koro un joler kuom Ruoth. Daguru kaka nyithind ler, ⁹(nikech gima olemo mar ler nyago oting'o gik mabeyo duto, gi gik makare kod gik ma adier.) ¹⁰kendo temuru mondo unge' gima miyo Ruoth mor. ¹¹Kwedreuru chuth gi timbe mag mudho, maonge ohala kendo hulgiuru e lela. ¹²Nikech en wichkuot kata mana mar nyiso gik ma joma richo timo ling' ling'. ¹³To ka gik moko duto ohul e lela to gi yangore maler ¹⁴nikech ler ema miyo ineno gik moko duto. Mano emomiyo iwacho ni:

"Chiew in manindo, chung' ia kuom joma otho, to Kristo norieny kuomi".

¹⁵Omiyo tang'uru ahinya kaka udak, kik udagi ka joma ofuwo, to daguru ka joma riek, ¹⁶tiuru gi thuolo ma un-go maber, nikech timbe maricho opong'o piny. ¹⁷Kuom mano weuru bedo mofuwo, to ng'euru gima Ruoth dwaro.

¹⁸Weuru mer gi kong'o nikech mano

kelo anjawa. Kar timo kamano to upong' gi Roho. ¹⁹Wuouru ng'ato ka ng'ato kod weche mag zaburi kuwero wende kitabu kod wende chuny. Weruru kendo denduru Ruoth e chunyu ²⁰ka uduoko erokamano kinde duto ni Nyasaye Wuoro kuom gik moko duto e nying Ruodhwa Yesu Kristo.

²¹Beduru gi winjruok ng'ato gi ng'ato, mondo umi Kristo duong'.

Mon Kod Chwo

²²Un mon winjuru chwou mana kaka de uluoro Ruoth. ²³Nikech dichwo ewi dhako mana kaka Kristo en wi Kanisa, ma en ringre to en ema en Jawarne. ²⁴Mon bende onego owinj chwogi e weche duto, mana kaka Kanisa bende winjo Kristo.

²⁵Un chwo, heruru mondu, mana kaka Kristo bende nohero Kanisa, mochiwore nikech en ²⁶mondo opwodhe maler, koluoke gi pi kuom wach ²⁷kendo eka ochiw Kanisa ne en owuon ka opichni maler kendo maonge chilo moro, kata jowruok, kata mbala moro amora kuome. ²⁸Kamano bende, chwo onego oher mondgi mana kaka gihero dendgi giwegi. Nga't mohero chiege oherore owuon. ²⁹To bende onge ng'ama ochayo dende owuon. Ng'ato ka ng'ato pidho dende kendo rite maber, mana kaka Kristo bende timo ne Kanisa ³⁰nikech wan fuonde mag ringre. ³¹"Emomiyo dichwo nowe wuon gi min, to nopadre gi chiege, kendo kargi ji ariyogo nobed ringruok achiel." ³²Wachni oting'o puonj maduong' mopondo to kata kamano awuoyo kuom Kristo gi Kanisa. ³³Kata kamano en ni ng'ato ka ng'ato kuomu nyaka her chiege mana kaka oherore owuon kendo dhako nyaka luor chwore.

Nyithindo Kod Jonyuol

6 Nyithindo, winjuru jonyuolu kuom Ruoth nikech timo kamano en gima kare. ²Chik mokuongo man gi singruok wacho ni "Mi wuoru gi minu luor ³eka mondo ngimani odhi maber, kendo idag

aming'a e piny."

⁴Wuone kik umi nyithindu bedo gi mirima; to ritgiuru maber, kurieyogi kendo upuonjogi kuom Ruoth

Wasumbini Kod Ruodhi

⁵Wasumbini, winjuru ruodhiu mondikou e pinyka kumiyogi duong' gi luor, kendo kutiyo gi chuny mathuolo, mana ka gima uwinjo Kristo. ⁶Kik uwinj-gi mana mondo umor wang'gi seche ma girangou, to mana ka wasumb Kristo timuru dwaro Nyasaye koa e chunyu. ⁷Tiuru gi chunyu duto, mana kagima utiyo ni Ruoth, to ok ni dhano, ⁸nikech ung'eyo ni Ruoth biro chulo ng'ato ka ng'ato kuom gimoro amora maber ma ng'ato timo, bed ni en misumba kata ng'ama ni thuolo.

⁹Un Ruodhi timneuru wasumbniu machalre. Kik ubuog-gi, nikech ung'eyo ni Ruoth motelonegi, kaachiel kodu nie polo, kendo ok odew wang' ng'ato.

Gii Lweny Mag Nyasaye

¹⁰Mogik, beduru motegno kuom Ruoth, kendo kuom tekone maduong'. ¹¹Manreuru gi gii lweny duto mag Nyasaye, mondo eka uchung' motegno kutang' ne wuond mar Jachien. ¹²Nikech lweny mwakedo ok en mar ringruok gi remo, to wakedo gi jotelo, kod ruodhi mag piny motimo mudhoni, kaachiel gi lang chuny maricho modak e kor polo. ¹³Omiyo manreuru mogik gi gii lweny mag Nyasaye, mondo ka kinde mag richo ochopo to uyud teko

mar chung' kar tiendu kendo kusetimo madwarore duto to mondo uchung'. ¹⁴Emomiyo nyonuru piny motegno, kutweyo nungou gi kamba mar adiera, kendo kurwako tim makare ka gii lweny mag akor; ¹⁵rwakreuru gi ikruok mar lando Injili makelo kuwe kaka wuoche e tiendu. ¹⁶Ewi mago duto ting'uru yie maru ka okumba mugeng'ogo aserni makakni ka mach moa kuom ng'at marach. ¹⁷Kawuru ogudu motegno mar warruok kod lig-angla mar Roho ma en wach Nyasaye. ¹⁸To lamuru kuom Roho kinde duto gi kit lamo duto, kendo ka ukwayo. Beduru gima e paro, beduru mokichore kusiko ukwayo kinde duto ni joma ler duto.

¹⁹An bende lamnauuru mondo saa moro amora ma ayawo dhoga to omiya weche mondo ayal gichir wach mopondo mar Injili, ²⁰omiyo an jambetre motue. Lamuru mondo awuo kuome gi chir kaka owinjore atim.

Mos Mogik

²¹Tukiko, ma en owadwa mwageno kendo matiyo ni Ruoth gi adiera duto biro nyisou weche duto, kaka achal to gi gima atimo. ²²Gima omiyo aore iru en mana ni mondo onyisu chalwa, kendo mondo ojiw chunyu.

²³Mad Nyasaye Wuoro kod Ruodhwa Yesu Kristo omi jowete duto man kuom Kristo kuwe, gi hera kod yie. ²⁴Ng'wono obed kod jogo duto mohero Ruoth Yesu Kristo gi hera maok rum.